

Bikira Mariya abonekera Nyiramukiza Valentine ku itariki ya 15/05/2021 i Bruseli mu Bubiligi mu rugo iwe - (Rue Wytmans, n°4 - 1050 Bruxelles).

Valentine *yabanje gusenga bucece. Bigeze aho, arapfukama maze atera indirimbo ikurikira Turakuramutsa Mubyeyi w'Imana, Bikira Mariya, ujye uduhakirwa, Bikira Mariya, ujye uduhakirwa.*

Bikira Mariya munyangeso nziza, utsinde ingeso mbi ziba mu mitima (2x). Refr.

Turakuramutsa Mubyeyi w'Imana, Bikira Mariya, ujye uduhakirwa, Bikira Mariya, ujye uduhakirwa.

Nyuma, akomeza agira ati : « Karama Mama. Ndi hano, ndi igikoresho cyawe n'icy'ab'isi yose. Vuga icyo ushaka, umuja wawe arumva.»

Arikiriza.

Bikira Mariya : « Bana banjye, ndabakunda. Bana banjye, ndabakunda. Bana banjye, ndabakunda. Bana banjye, ndabaramukije. Murakagira abababyara, namwe murakagira abo mubyara. Bana banjye, ndabashimira yuko mwajye muri benshi, kandi ndabashimira ubwitange n'ubwigomwe mwigomwe ibyanyu byose.

N'uwaba aje atemera, agerageza, yihitira, yiyumvira na we ndamushuhuje.

Na we ni umwana wanjye. Kandi nta we ugenda nta cyo akuyemo ».

Valentine : *Arikiriza.*

Bikira Mariya : « Bana banjye, nzanywe no kugira ngo nongere mbasubiriremo.

Nti ni mushikame musenge, ni musenge nta buryarya, ni mukundane bamwe n'abandi, ni mubabarirane, ni musabe imbabazi, ni muce bugufi, ni mufashanye bamwe n'abandi, ni mwuzuzanye, ni mwakire abaje babasanga nta nyungu.

Abashakanye ni mugerageze gutahiriza umugozi umwe, mugire isengesho ry'urugo intwari yanyu itavaho kugira ngo urukundo, umubano n'ubusabane birusheho kwiyongera mu rugo rwanyu, mubisige n'abandi. »

Valentine : *Yikirije n'umutwe (2x).*

Bikira Mariya : « Bana banjye, buri muntu wese asubize amaso inyuma muri aka kanya arebe aho yicaye, n'uwo bari kumwe, mwibuke kuri uyu muni iki gihe, mwabaga muri he, mumeze mute, mukora iki ?

Iyo abantu bakomeza urukundo, isengesho rikaba rimwe, bagatahiriza umugozi umwe, bari kuganza umwanzi wigabije isi, maze mukagira amahoro, kubera ko umwanzi yabatwaye ibyishimo, abatwara umuco, umutima n'umubiri, ababuza ubwisanzure ku byanyu, abaheza mu ngo zanyu kugira ngo buri muntu wese ahore atongana n'undi kubera ko nta kandi kazi, kubera ko buri muntu wese abona ako ariko kose.

Ndabinginze, mushyire Imana imbere kugira ngo byose ibibashoboze, kuko abenshi bibwira ko kudasenga bashobora kwirangiriza ibibazo. Abandi bati : « gusenga ntabwo ari byo bihagije gusa. » Nagira ngo mbabwire ko iyo usenga ubivanye ku

mutima, ibyo ushaka biruzuzwa, iyo ushaka urumuri urarubona, ndabasabye ni mugire urukundo.

Mwibona bagenzi banyu ko atari abantu, kandi mwese muva amaraso, nta we uva amazi ! Mwumve niba icyo bagukoreye kikakubabaza, ko nawe ugikoreye abandi cyabababaza. Abasenga ni

mudashyira hamwe, ngo mukundane, mwubahane, mureke gusebanya no kwikuza, isengesho ryanyu ntirizakura.

Bana banjye, ni mwigie gusaba imbabazi, kuko gusaba imbabazi birakiza, birubaka kandi bituma abantu bose baba bazima.

Mwigie kuvuga ngo « nsabye imbabazi mbikuye ku mutima ». Ubikure ku mutima n'umutima wawe wose, nta buryarya. Bagusubize bati : « Turakubabariye ». Kuko iyo umuntu avuze : « Ndakubabariye, nsabye imbabazi », ntacyo biba bivuze ».

Valentine : *Arikiriza.*

Bikira Mariya : « Nimugerageze kurwanya ubwikuze, ubwibone, muce bugufi ».

Valentine : *Arikiriza.*

Bikira Mariya : « Bana banjye, hari ababizi n'abatabizi, igihe namanukaga nkajya i Kibeho, mu gihugu cy'Urwanda, mu gihugu cyacu cyatweguriwe, Jyewe n'Umwana Wanjye Yezu Kristu, icyatanzwe ntigisubizwa, igihugu cy'Urwanda ni icy'Umwami n'Umwamikazi.

Umwami, munyumve neza, ni Yezu Kristu, Umwami w'abami bose n'Umwamikazi usumba abamikazi bo ku isi, Jyewe ubabwira none aha ! »

Valentine : *Arikiriza. Yikirije n'umutwe inshuro ebyiri.*

Bikira Mariya : « Naje nzanye n'Umwana Wanjye, naje kubigisha, naje mbasaba gukundana, mbasaba gusenga nta buryarya, mbateguza kugira ngo mwirinde amakuba atazabagwira. Mwica amatwi, bana banjye. Umwana wanjye aragaruka, mwica amatwi, bana banjye, kugeza igihe icyo twajye kubarinda kibaguyeho, kubera abana batumvira Umubyeyi.

Ndabababarira. Ariko icyambabaje, n'ikimbabaza, nuko mutakiriza yombi ibyo mbahaye. Kuko mfite urukundo rwo kubaha, nabahaye, kuko mbakunda, mwinangira imitima.

Ndacyababwira ko nimukomeza, ibibababaza bizikuba incuro nyinshi bigakomeza bikabababaza. Kuko abenshi musenga mwagezweho, mugasenga mu binyoma !

Abihayimana muri he ? Uruhare rwanyu ni uruhe ? Kuva amaraso yameneka kugeza ubu akimeneka, atarigeze ahagarara, mukora iki ? Icyo mumariye abakristu kugira ngo mubegere mubigishe urukundo, mubuze iki ? Mwifunga imitima nk'uko kiliziya zifunze !

Ndabinginze bihayimana, ni mufungure. Nababwiye ko aho twajye i Kibeho ariho hari umukiro wa benshi. Muvutsa abantu gukira. Simbabwiye ko uburwayi budahari, ariko ntabwo ari bwo mwirinda, ntabwo ari bwo murwanya, ahubwo murwanya

Ijambo ry'Imana, murwanya ukwemera kuko abakristu bagenda basubira inyuma buhoro buhoro. Kiriziya zizafungwa zifunzwe !

Ndabinginze, ni muhaguruke, bakardinali, basenyeri, bapadiri bato n'ababungirije, mugende musengere muri kiriziya mwirukane Shitani yicayemo, mwirukane amarorerwa yabereyemo, mwegere abana, mubasane imitima yabo. Imitima ni myinshi itonyanga amaraso, kubera kubura ubumva, kubera kubura uwo basanga, ndabategereza mwese nkababura !

Ikitabafitiye akamaro ni mukireke, ni mukorere Uwo mwiyegeye. Na mwe banyamadini, banyamatorero, mujya hariya mukamamaza Izina ry'Umwana Wanjye Yezu Kristu, muri he ?

Mu biki ? Mukora iki ? Ibyo mwigishaga byagiye he ? Abo mwigishaga bari he ? Igihe kirageze cyo kugira ngo mbabwire ko nta we ukunda Umwana ngo yibagirwe Nyina wamubyaye !

Iyo usuzuguye Umubyeyi, Umwana agusohora mu nzu ye ! Ndabinginze. Ndahari mwese ngo mbashyire mu gishura cyanjye, nabaragijwe ku Musaraba. Ndabinginze bakristu, nimwubake urukiramende, kuko abashyize hamwe, umwanzi ntabona aho amenera.

Mwigisha « Kibeho-Nyina-wa-Jambo », mwigisha « Kibeho-Umubyeyi-waje-kubasura » mukibagirwa icyo yabasabye, mukibagirwa icyamuzanye. Vuga irutwa na kora ndebe.

Tunyagirirwa inyuma y'urugi. Mwisenya ibizabafasha kera, bigafasha abana banyu, abuzukuru n'abuzukuruza, abazaza babasanga. Mwisenya amateka yanjye ngo mwubake ayanyu. Mwikwihakana Yezu kandi mwaramwihaye. Hari bamwe na bamwe bakorera ijisho. Buri muntu nzamubaza ibye. Mwica intege abasanga, mwibatoteza, mwibabeshyera ngo mubagerekeho ibyo badafite mu mutima. Ahubwo ni mubegere mubumve, mubayobore. Bana banjye, mbereka imivu y'amaraso n'uko abantu bazababara, bazapfa, nababajwe ko naberetse ikibaya kirimo abantu benshi bapfa, bicwa, ntimwabyumva, biraba. »

Valentine : *Yikirije n'umutwe.*

Bikira Mariya : « Bana banjye, igihe nariraga i Kibeho, nari mbabaye, mbabajwe n'ibyo mbona bizababaho kandi nkababwira ntimubyumve. Nababwiye ko kiliziya y'Umwana Wanjye izaba itongo, agakomeza akayituramo. Ibyo byose mwarabibonye. Ariko icyongeye kumbabaza n'ubu kimbabaza ni ukumva Kiliziya ya Kibeho, aho twaje, aho kunyubakira bansenyera !

Mu kunsenyera, bakansenyera barakaye, bafite umujinya, bibwira ko gusenya aho ubwanjye nagiyeye kuvana amarozi n'ibindi bibi byose byicaga abana banjye bahanyuze, cyane cyane abana b'abanyeshuri bigaga mu ishuri rya Kibeho, n'abahanyuraga bese bagahumana.

Hari mu mayira-abiri. Ni Jyewe ubwanjye n'Ukuboko kwanjye nunamyeye mbikuraho, kuko ku bwa muntu ntawari kubishobora ! Bana banjye, hakiriye benshi kandi ntibazareka kuhakirira.

Ariko uwansenyeye, nk'uko Umwana Wanjye bamukubise icumu mu rubavu hakavamo amaraso n'amazi, bacura umugambi wo kunsenyera bamvushije amaraso na Njye !

Ya marira narize kiriya gihe, haje amaraso kuko numvise umutima wanjye ukomeretse, kuko bitakozwe n'umupagani, kuko bitakozwe n'ushaka inyungu z'isi, kuko bitakozwe n'uwhitira, byategetswe n'uzi agaciro k'Ingoro !
Bana banjye, IHURIRO RY'ABEMERA BOSE, iryo zina ni Jye warihise, ni Jye waryanditse hasi ! Hahurira... hahuriraga...hahurirwaga... »

Valentine : « Ntabwo ndikubisoma neza » !

Bikira Mariya : « ...Hahurirwaga n'abantu benshi, imbaga nyamwinshi, abazwi n'abatazwi, abarwaye indwara z'umubiri n'iza roho, abafite ibibazo mu ngo zabo no mu miryango yabo, abananiwe urubyaro n'abananiranywe n'urubyaro rwabo, impfubyi zasigaye zonyine, abapfakazi. »

Valentine : *Arikiriza. Yikirije n'umutwe.*

Bikira Mariya : « Ndababaye. Kandi ntabwo ari ubu mbabaye, nababaye umunsi babitekereza kubikora, batarabikoze kera. None se, bana banjye, ama « chapelles » yo ku muhanda ntabwo ku isi yose, atari i Kibeho gusa ? Kera abapagani, n'abashaka inyungu bakuragamo amashusho yanjye bakayamena, bakabura ibyo bashaka bagakomeza, ariko nta wigeze ahirika inzu !
Nagira ngo mbabwire ibyo mutazi : igihe abantu babatwikiraga mu kiliziya, hari benshi bahahungiyeye, baragenda barahahobera. Amamodoka yica abantu yarahahise, ntiyababona kuko bari mu gishura cyanjye ! Muhashenye mute ? Muzi amateka y'aho ari ayahe ?
Mbere yo kubikora narabateguje, ndababwirira nti : « Hagowe uzasenya IHURIRO RY'ABEMERA BOSE. » Nta muntu n'umwe wari urizi cyangwa ngo aryibuke.
Uzahagura akahafata nabi. Nta wahaguze ngo ahasenye, n'ibyo batekerezagaga si byo byahashenye ! Nta n'ubwo byari kuba !

Valentine : *Arikiriza.*

Bikira Mariya : « Mwikwivanaho imigisha, kuko Kibeho ni uruhimbi rw'abayigana, ni ikiriri gisasira abasinzira, ni uburiri butabara abarembye. Mureke abantu baze bayigana, mwiwigira isambu y'umuntu, mwiwigira agace k'umuntu, ni muyigire isangano ry'abantu b'impane zose z'isi.
Mureke abarwayi baze tubavuye, ni muzane iyo mitima yuzuye ishyari, yuzuye inzangano. Ndabasabye, bana banjye, ni mube umwe nk'uko na Data wo mu ijuru ari Umwe na Twe. Murapfa ubusa.

Valentine : *Yikirije n'umutwe.*

Bikira Mariya : « Bana banjye, ikibazo ni uko nta we usubira inyuma ngo asabe imbabazi, yumve ko n'ibyo yakoze atari byiza. Ahubwo mukisobanura ku bantu batazabaha igisubizo.

Bana banjye, mwese mwakomeretse, mwababaye, mwebwe mwafashe umwanya wanyu wo kunsukurira nkagenda nsukuye, ntabwo ari amatafari mwasukuye, bana banjye.

Ni Ikirenge, ni Ukuboko, ni Umutwe, ni cya Kiganza Cyanjye, ni cya Gishura Cyanjye mwasukuye. Ndabashimiye kandi mbahaye umugisha wa Kibyeyi.

Mwikomezza kugira intimba. Kandi ibyo mwahuye na byo byose, mwihangane, mubabarire.

Namwe, bana banjye, mwababaye mwese, mwihangane ahubwo mupfukame musenge, musabe kugira ngo inkundura iri inyuma itazabajyana nk'inkubi y'umuyaga.

Musenge kugira ngo abantu bapfa, abantu bababaye, abantu bashonje, abantu bazira akarengane, ibyo byose bishire kuko ni ingaruka z'ibyo byose, y'uko Urwanda rwanze kumva no kwakira.

Ahari umugisha hazajya umuborogo n'ibibazo by'urudaca. Kuki muhabwa umugisha, bana banjye, mukawitesha ?

Ndabinginze guhera ubu mukosore ibyapfuye byose. Abihayimana murwanire ubutagatifu bwanyu, icyabakuye iwanyu, mufashe abakristu kwitagatifuza, musubire mu masakramentu matagatifu, mujye mwongera muhure mwishime, mutange amasakramentu y'abarwayi, amasakramentu yo kwicuza ibyaha. Uzanyizera, nzamurinda, n'iyi yarwara azakira.

Uri uwanjye arababara. »

Valentine : Arikiriza. Hanyuma atera indirimbo ikurikira :

« Hazaza ibitangaza, abavura mu Izina ryanjye, abahanura ibinyoma. Ntimuzamenya icy'ukuri icyo ari cyo, kuko nzaba narabasabye mukanyima, kandi nabaha ntimwakire ntimushimire. Bana ba Adamu na Eva, iby'isi byari byahanaguwe igihe Yabapfiraga. Nimusuzume imitima, nimwisubireho, maze mumubwire muti : « Nyagasani turabyemeye.»

Bikira Mariya : « Bana banjye, iyo ndirimbo ni iya cyera cyane !

Yezu ayigisha yaravuze ati : « Hazaza ibitangaza n'abavura mu Izina Ryanjye. Yarivugaga.

Icyo gihe yashakaga kuvuga ati : « Ibintu byose nibiza muziruka, kuko muzaba mwarihebye, ntimuzamenya icy'ukuri mukurikira, n'icyo mudakurikira.

Hazaza ibitangaza muhurire, abavura mu Izina Ryanjye, ntimuzamenya icy'ukuri icyo ari cyo, kuko nabasabye mukanyima, kandi nabaha ntimwakire, ntimushimire.

Bana banjye, umwana w'indashima yibagirwa nyina wamubyaye. Ndabinginze, ni muce bugufi kuko ndabizi ko urwo rukundo murufite ».

Valentine : *Arikiriza.*

Bikira Mariya :

« Nimushakashake urukundo mu mitima yanyu kuko rurahari. Mwisenya ahubwo nimwubake. Bana banjye, hari impfubyi nyinshi zifite ibikomere bitandukanye.

Abantu bose, umwe avuze ibye, n'undi akavuga ibye, bana banjye, bwakwira bugacya !

Ni yo mpamvu mbabwira nti : « Ni munsange mumbwire ikiri ku mutima wanyu.

Ni munsange mbavure, ni mutsinde Sekibi ibashuka iri mu mitima yanyu.

Mwibagara urwango mu mitima, mwirubagarira ahubwo ni murukuremo burundu.

Ni mwubake igihugu cyanyu, bana banjye, ndabinginze. »

Valentine : *Arikiriza.*

Bikira Mariya :

« Bana banjye, uyu muni nzanywe no kugira ngo mbinginge, nongere mbasabe.

Abasenga mwese ni musenge mubivanye ku mutima kuko mutazi umuni n'igihe.

Mwigendera mu kinyoma, kuko ikinyoma kirasenya nticyubaka.

Bana banjye, ushobora guhisha umuntu, ariko ntushobora kumpisha.

Bana banjye, igihe kirageze cyo gukura, mukava mu bucakara bwa shitani, mukava mu gihu cyababuditseho kibabuza kubona neza.

Kuko birambabaza iyo mbona mwijyana ahabi, kandi naraje n'Umwana Wanjye kubashyira aheza. Ugira Imana abona umuhana. »

Valentine : Arikiriza.

Bikira Mariya :

« Umugabo ni uwisubiraho, akareka ikiri ikibi, akajya mu kiri icyiza.

Bana banjye, nongere mbibutse, Yezu yacubije umuhengeri, ahagarika umuvumba, Yezu yagaburiye abantu atahashye ngo yuzuze inzu, Yezu yatubuye Umugati na Divayi, abaha Umubiri, murumva icyo mwamuburana ari igiki ?

Ni mushaka muzemeze ko yaje, tukazana twembi gusa, ko nta we yiyeretse.

Ariko Ikiganza mwigikura aho cyaje ngo ikirenge mugiterure ! Mwese arabacumbikiye. »

Valentine :

Ateye indirimbo : « Yezu Mwami w'ishema umara agahinda, uze kudukomeza turakwambaza. »

Bikira Mariya :

« Bana banjye, iyi ndirimbo yahimbwe n'umuntu. Yari azi Yezu. Ubu mumwirengagije mute ?

Valentine : *Arikiriza, hanyuma arapfukama.*

Bikira Mariya :

« Bana banjye, muri kano kanya, mbahaye umwanya kugira ngo bimwe utashoboye gutuma, bimwe wavugaga ngo bakuvugire ubyivugire, aho uri mu rugo rwawe, mu rugo rw'umuturanyi, aho ucumbitse ... ndakwinginze.

Ndi hano kugira ngo mbumve, naje kugira ngo mbatege amatwi, mbahaye akanya kugira ngo buri muntu wese ambwire ikimuri ku mutima, icyo yifuza kugeraho, icyo ashaka kumarira abandi, aze ansange.

Bana banjye, mbateze amatwi. Aceceka akanya, hanyuma arakomeza ...

Mwigira ubwoba, bana banjye, ikiri ku mutima abe ari cyo uvuga, wishakisha ikidahari.

N'amarira yanyu ndayakira, na bya bisebe byanyu ndabyakira, ha handi wakomeretse, uhanyereke, mwana wanjye, unyereke na bya bindi bya wa wundi utaje, mutari kumwe, utabibona.

Bana, ndabinginze ngo mwubahe ababyeyi banyu, mubakunde. Umwana udakunda nyina wamubyaye aba abuze byinshi !

Umwana udakunda se wamubyaye, kandi amubona, amushaka, n'utamufite aramwifuzza akamusabira.

Bana bababara kubera ababyeyi babo babima urukundo, babasiga bonyine, mwikwigira impfubyi kuko ndahari, mwikwitwaza intege nkeya ngo mukore amakosa yanyu muyagereke ku babyeyi, ku bavandimwe n'inshuti, ahubwo ni mwiyemeze muce bugufi, musabe imbabazi ku giti cyanyu bivuye ku mutima. »

Valentine : *Aceceka akanya.*

« Ndatinya ko ndasanga mugiyeye ! Jyewe ibyanjye mbivuze ni byinshi !

Hari n'ibyo abantu baba bantumye, byose murabizi kandi murabibona.

Abantu bose barababaye. »

Bikira Mariya :

« Bana banjye, (Valentine arahaguruka) mwitinya kumbwira ibikomere by'ababyeyi banyu babababaje, bakabafata ku ngufu muri bato, ababyeyi babababaje bakabata bakagenda, mwitinya kumbwira abana bataye ababyeyi, kuko igikomere icyo ari cyo cyose kirababaza.

Bana banjye, mwese muri abarwayi, ni mwivuze.

Bategetsy b'ibihugu, na mwe ni mwivuze, ni mutegeke mutegekana urukundo abo mutegeka, mubayoborana umutima w'ubumuntu. Abayoborwa namwe mwumvire, mukure.

Valentine : *Ateye indirimbo ikurikira :*

1. Utsinda umwanzu umuhashya burundu kugukuzza biriyongera impande zose z'isi.

2. Habwa impundu Mariya Nyina wa Jambo, wowe wabyaye Umatabazi ari we Yezu Kristu.

Ahagarika kuririmba, arikiriza hanyuma akomeza agira ati :

« Ndakumva Maman. Ariko se Maman, ko ubona ibintu byose biri kuri iyi si, ukabona ingorane zose zihari, urabona twese twabyifatamo dute ? Turategekwa tugomba kumvira.

Valentine *arikiriza hanyuma yitaba agira ati : « Karame ».* *Arakomeza :*

« Maman, jyewe ibikomere byanjye, kereka mbikubwiye turi twenyine, abantu b'iwanyu bashobora kuba babanze amatwi !

Hari igihe nkubwira ngasanga ibyo twavuganye bimwe babyumvise. Aceceka akanya, ateze amatwi, hanyuma ati : Na njye nakwishima.

Igikomere mfite kimbabaje, ... ni byinshi, ariko icyambabaje cyane muri iyi minsi nkumva ndarwaye, ni chapelle. *Arikiriza.*

Nibutse ukuntu najyaga njyayo nijoro, ngahura n'ibisimba mva mu misa, ngiye gusenga yo saa cyenda mvuye mu rugo kandi singire icyo mba.

Ibyo byose nta muntu n'umwe wabivuze, nta n'aho byanditse. *Arikiriza.*

Ikindi ni uko nibuka ukuntu nahahobeye n'abandi n'abandi ... nsanze bari gutwika i Kibeho, kiriziya bazanye gutwikiramo abanjye, n'inshuti zanjye, abo mwantumagaho bese.

Nta handi numvise nahungira usibye guhungira kw'IHURIRO RY'ABEMERA BOSE !

Abo twari kumwe twaragiye, tuhahirira n'abandi, ariko twese baduciyeho kandi ni gato nta winjyemo twari twihishe, buri muntu yahahobeye gusa.

Icyo gikomere, ibindi byose narabyihanganaye, ariko icyo cyananiye kucyihanganira, kuko numvise kiruta ibikomere byose nagize muri mirongo cyenda na kane bantera ibyuma, banshyira mu mwobo, Yezu akankuramo nkaba ndi muzima.

Byose numvise byari byarashize, ariko haje ibya chapelle numva ibikomere byongeye n'inkovu numva zongeye kuva.

Ni yo mpamvu rero ngusaba kugira ngo, nihereyeho nkumva ikimbabaza, ugenderere abana bose bakomeretse mu ntambara, abakomerekejwe n'ubugome bw'abantu n'inzangano, abakomereka ubu ngubu, ugende ubomere ibyo bisebe, ubahoze kuko ni benshi cyane, ni benshi pe !

N'utavuga aba yarashize ! Hari n'abakomeretswa n'urukundo ruke ruba mu miryango yabo, umuryango ukakwanga ukaba impfubyi kandi bahari. Nanjye mumfashije rero bikagabanuka mu mutima, kuko ibindi by'abandi ndabyihanganira, ariko icyo cyarananiye.

Nababajwe n'uko wavuze ko ari inkota baguteye mu mutima ukava amaraso, kandi ni byo. Kuko uwabikoze ntaho yatanira n'uwashe Umubiri wa Yezu Kristu n'Amaraso ye akabikoreraho ubufindo, nk'igihe bamujyana kwa Pilato !

Ndabasaba kugira ngo umpe imbaraga n'umutima wo kubyakira, ariko cyane cyane kubabarira ababikoze, mbibaharire kuko ari abana banyu. Arikiriza.

Na bariya bese bampiga bashaka kungirira nabi, ntawe nakoshereje, ntawe nabwiye nabi, na bo ndabababariye kandi na bo jya ukomeza uturagire, uragire abantu bese basenga bakuvuga, benshi baratotezwa, Maman !

Abenshi bagatotezwa kubera nje, cyangwa nzajye nkwiwonera turi twenyine, noye gutera abandi ibibazo. Barabatoteza, bakabatega mu nzira, bakabasenyera ingo zabo, byose bakabingerekaho ngo nasenye ingo zabo, bwacya bakanjyana mu manza, bakajya kutangaho ngo ni jye usenyera abantu, bakagera muri za églises bakancira urw'iteka, ntazi n'ibyabaye.

Ubu se tugiye twiganirira twenyine, sinajya ngutumikira ? Arikiriza. Aceceka umwanya, hanyuma arikiriza.

Bikira Mariya :

« Bana banjye, murakoze ibyo mwambwiye byose nabyumvise.

Ni musenge muruhuke, muhereze, muce bugufi musabire ibihugu byanyu by'Afurika birugarijwe, musabire ibihugu byanyu by'Iburayi, musabire ibihugu byanyu by'Amerika, mbese musabire isi yose, kuko yugarijwe n'amakuba n'ibibazo byose bitandukanye kubera ko umwanzi shitani yigaruriye isi, abasenga bagatotezwa bakaba bacye, n'abihayimana bakagira intege nke, no mu bihayimana hakabaho abihayimana mu magambo, ku murimbo, atari mu bikorwa. »

Valentine : Arikiriza.

« Urakoze, ndabyumvise. Arikiriza. Nzababwira ». Arongera arikiriza. Arunama, arambura amaboko maze, akomeza agira ati : « Mubyeyi mwiza, ndi igikoresho cyanyu n'icy'ab'isi yose, mujye mukoresha icyo mushaka, muntume aho mushaka n'uko mubishaka. Ndabyemeye. No kubabara hajye hakora ugushaka kwanyu, atari ugushaka kwanjye. Arikiriza.

Mujye mundinda kumenya abandi kandi na nje ntiyizi, noye kugira uwo mvuga kandi ntamuzi. Arikiriza. Urakoze, Maman ! Uri Umubyeyi mwiza. »

Bikira Mariya :

« Bana banjye, ibyo mwambwiye nabyakiriye. Mbahaye umugisha wa kibyeyi. Ntimukihebe ngo muhungabane, mujye mwiherera mumpamagare.

Muhamagare Umwana Wanjye Yezu Kristu mwizeye ko ibyo mumusaba, ibyo munsaba byose mubibona.

Bana banjye, mufate Rozari muyivuge mutarangaye, muyivuge mubivanye ku mutima kuko ni yo izababera akabando kabasindagiza, izabageza mu bwami bw'ijuru.

Mujye mumpamagara ni munanirwa.

Bana banjye, hari benshi mwambwiye ko munkunda, hari benshi mwambwiye ko muntashya, hari benshi mwambwiye ko mukeneye inkunga. Ni muyishakashake muyikorere, kuko na Njye ndabakunda, kuko na Njye ndabashakashaka.

Ni mugerageze kwicuza, mugerageze kumva Misa muhazwe kugira ngo mukomere kuri roho, mutsinde umwanzi mumuhashye burundu mu mitima yanyu. Valentine yikirije n'umutwe. Hari ababyeyi benshi bababaye, bafite abana barohamyeye mu biyobyabwenge, mu ngeso nyinshi zinyuranye. Ni muhare amavi mubasengere.

Hari benshi batandukanye n'abana babo babuze aho bongera guhurira. Iyo usabye wizeye, nta kinanira Imana n'abantu, ariko iyo usabye ku giti cyawe ntagishoboka. Kuko kenshi mushaka ko tubaha uko usabye, twebwe twabasaba ntimuduhe. Mujya muca umugani mu kinyarwanda ngo : « Akebo kajya i wa mugarura ! »

Valentine : Arikiriza maze ati :

« Uwo ni ubwa mbere nywumvise ! Asubiramo uwo mugani, inyuguti ku yindi : Akebo kajya i wamugarura ! *Arikiriza.*

Bishatse kuvuga iki ? Atega amatwi hanyuma arikiriza.

Bikira Mariya :

« Agasozi kamanutse inka kazamuka indi ! »

Valentine :

« Ni bande babivuga ? *Arikiriza...*

Hanyuma bavugana hagati yabo amagambo tutumvise, uretse ko twaje kumva Valentine avuze ngo : « Ni régime. Oya ntabwo ari ukubera yuko ntabyemera. »

Bikira Mariya :

« Nongeye kubasaba ngo mukomeze musenge, abapfuye bose bazahambwe, kuko nta we uzuka atarahambwe ! Igihe hatarasomwa misa y'abihayimana b'abasenyeri bakomeye bari bafashe inkoni y'ubushumba muri diyosezi zabo, batahambwe mu cyubahiro, bakiri mu cyeragati, Kiliziya izakomeza gutotezwa. Valentine yikirije n'umutwe. Umukuru iyo apfuye ntahambwe by'ukuri, abo asize inyuma bararindagira ! Byinshi bihishwa muntu, ariko nta na kimwe muhisha Imana, nta na kimwe tutabona. N'ibitaboneka twarabibonye, n'ibitazwi Twe turabizi. »

Valentine :

« None se mwazabitubwiye tukabikora niba ari byiza tukabikomeza, hanyuma ibyo bibi tukabivanaho tukagira amahoro ? *Arikiriza.* Cyangwa mugafata abantu bose bapfuye bazira

akarengane, bose mukabagira abatagatifu, hakaboneka imirambo yabo bose, cyangwa aho bahambwe, cyangwa aho bari hatazwi haraje amaroza meza agahumura ! *Arikiriza*. Kuko hari benshi barenganye ! *Arikiriza*. Hari benshi bagiye baticujije, benshi batunguwe. Hari abana bato. » *Yikirije inshuro nyinshi*.

Bikira Mariya :

« Bana banjye, ibibondo byose byari abamalayika byose biri mu gishura cyanjye ! »

Valentine :

« Murakoze, Maman ! Arikiriza. Abana bose ? None se ko ari ab'icyo gihe, abagenda ubu ngubu ho bigenda gute ? Na bo murabakira ?

Hari abana batoya bishwe bazira ubusa, bakicwa n'ababyeyi, bakicwa n'abaturanyi, bakicwa n'ababanga, bakicwa n'abanga ababyeyi babo, ibintu nk'ibyo. Urabyumva !

Abandi bagapfa bataravuka, bakabica ku bushake Arikiriza. Abo bose ujye ubababarira kuko batazi icyo bakora. Arikiriza. Urakoze, Maman ! Arikiriza. Kw'Izina ry'Imana Data na Mwana na Roho Mutagatifu. Amina. »

Bikira Mariya :

« Bana banjye, aho muri hose, mu ngo zanyu, mu baturanyi, aho mwatembereye, n'abo mwasize, n'abo mutazi bo mu muryango wanyu mwasabiye, bose mbahaye umugisha wa kibyezi kw'Izina ry'Imana Data na Mwana na Roho Mutagatifu, Amina.

Bana banjye, amazi mwashyize imbere zanyu n'indabo ndabibona, aho muri hose, mu bihugu murimo byose, yose nyahaye umugisha. Ariko ntabwo mpaye umugisha ibitembo, mpaye umugisha ayo mwavomye, ntabwo mpaye umugisha ibyo muvumamo, mutabyitiranyaga, bana banjye. Mpaye umugisha amazi mwavomye, kuko ntabwo mpa umugisha ibitaboneka. Ibyo mufite byose bidahaye umugisha, namwe, n'abanyu mbahaye umugisha wa kibyezi. N'amazi avomye ateretse nyahaye umugisha, kw'Izina ry'Imana Data na Mwana na Roho Mutagatifu, Amina.

Valentine arambura amaboko, ahindukira agenda ahindura icyerekezo arebamo...

Bana banjye, mu mpande zose z'isi, aho muri hose mwanyiteguye uyu muni, n'abari mu Rwanda, n'ababuzwa kujya i Kibeho, n'abishwe n'agahinda mu ngo zanyu mbahaye umugisha kw'Izina ry'Imana Data na mwana na Roho Mutagatifu. Amina. Abarwayi, abari mu bitaro, abarwariye mu ngo zabo batagira ababasura, bana banjye mwese mbahaye umugisha, kw'Izina ry'Imana Data, na Mwana na Roho Mutagatifu.

Namwe mushidikanya, namwe mutemera ko Umwana Wanjye yaje, mbahaye umugisha wa kibyezi, kw'Izina ry'Imana Data na Mwana na Roho Mutagatifu.

Bana banjye, Ndi Umubyeyi w'impuhwe nyinshi, Ndi Umubyeyi ubabarira kandi utanga byose. Ni mwisubireho, bana banjye, mufate ikizima, mugifate nk'ikizima, igipfuye mugifate nk'igipfuye. Ariko mwitanga ibyanyu ngo mubihe abandi, mwikwirengagiza inshingano zanyu za Kiliziya ngo mwizere ibihita bitazagaruka. Mbahaye umugisha kw'Izina ry'Imana Data na Mwana na Roho Mutagatifu. Ndabashimira, bana banjye, mugerageza gusana imitima y'abakomeretse, kumva ababagana, guhoza abarira, gufasha abababaye no kwegera indushyi zose. Mukomeze Rozari zanyu, ntimugacike intege ngo mubare igihe, kuko iyo ibibazo byaje byose birabananira.

Mpaye umugisha abana bose biga bibaruhije, biga muri bino bihe bari kw'isi yose, kugira ngo bumve ko nta cyo umuntu abona atarushye. Ariko kandi ko icyo umuntu ashaka akigeraho kuko inzira yanjye irafunganye, ntabizaza ngo bibiture mu ntoki, bana banjye. Mujye mubikora mu gusenga no kwizera. Mbahaye Umugisha kw'Izina ry'Imana Data na Mwana na Roho Mutagatifu. Valentine arikirije.

Bana banjye, mwaturutse imihanda yose, mwaturutse ahantu hose bibagoye, mukaza rwose mwiruka munsanga, namwe mbahaye umugisha, kw'Izina ry'Imana Data na Mwana na Roho Mutagatifu.

Na mwe bana batoya musenga, mukemera kwitanga mukareka ibitotsi byanyu, mukavuga Rozari, amasengesho yanyu ndayumva. Namwe mbahaye umugisha, kw'Izina ry'Imana Data na Mwana na Roho Mutagatifu.

Mpaye umugisha ababyeyi banyu, kw'Izina ry'Imana Data na Mwana na Roho Mutagatifu, Amina. »

Valentine : Arikirije, hanyuma atera indirimbo ikurikira :

« Muzabona ibibagora bishaka gutambamira urwo rukundo, murabe maso hatagira umwanzi ubacamo icyanzu, murakomeze mutwaze ntabwo nzabahana, nzahorana namwe ntsimbura ibibarwanya, wa mwanzi w'icyatwa ujya ubakurura mu cyaha nzamukubita ijanja mwimure mureba ! Muhumure naratsinze nimika urukundo. »

Bikira Mariya :

« Bana banjye, ntihagire ikibakanga, mukomeze Rozari yanyu kuko kugira ngo iyo saha ishagirweho, nasabye uwo mbatumaho kugira ngo ashake uburyo bwose bwo kugira ngo abavane mu bwigunge, ababe hafi nk'uko mwaba muri kure kuko abenshi yabonaga mugeze ku bintu bikomeye.

Bana banjye, ndashimira ama « groupes » yose, amatorero yose, urugaga rw'abakristu mwese. Ndashimira abantu bose bavuga Rozari, bavuga ishapule y'ububabare, bavuga ishapule isanzwe, bavuga « Ndakuramutsa Mariya », ngo mukomeze ntimucike intege, burya mba ndi kumwe na mwe ! Na mwe mbahaye umugisha kw'Izina ry'Imana Data na Mwana na Roho Mutagatifu.

Mpaye umugisha abafasha abandi bose kugira ngo na bo bashobore kugira imbaraga, bashobore gusingiza no kwambaza babikuye ku mutima, kw'Izina ry'Imana Data na Mwana na Roho Mutagatifu. Amina. »

Valentine : Arikiriza hanyuma atera amasengesho akurikira :

Kw'Izina ry'Imana Data na Mwana na Roho Mutagatifu, Amina.

Ngwino Roho Mutagatifu, usanganye imitima y'abakwemera bagukunde, wohereze Roho wawe, byose bibe bishya, n'isi izabone guhinduka.

Dusabe, Mana wamenyesheje abakwemera Roho Mutagatifu, turagusaba kubwirizwa na We, gukunda ibitunganye, no kunogerwa na We iteka.

Ku bwa Yezu Kristu Umwami wacu.

Bikira Mariya :

« Bana banjye, mwese mufasha abandi kugira ngo bashobore kumva Ijambo ryanjye, bashobore kumva urukundo rwanjye, bashobore gusenga, mujye mwihanganira ibyo

muhura na byo, na mwe mbahaye umugisha, kw'Izina ry'Imana Data na Mwana na Roho Mutagatifu ».

Valentine *yikirije inshuro nyinshi, hanyuma ati :*

« Ufite akazi kenshi, tumaranye iminota ine gusa ? Maman, ndasanga abantu b'iwacu barakaye kuko nabasize bonyine muri Rozari. Arikiriza.

Bikira Mariya :

« Bana banjye, bihayimana bapadiri, mwebwe mwigomwe muri bino bihe byose by'icyorezo mukagera ku bana banjye, mukabaha Umubiri n'Amaraso by'Umwami wacu Yezu Kristu, Umwami wanyu, mugakora umurimo mushinzwe, n'ubu mukaba mudahwema kubagezaho Ijambo ry'Imana, ababikora mu rukundo nta buryarya babishaka, ababikora kubera ubwitange, ababikora kubera urukundo bafitiye Umwana Wanjye, mbahaye umugisha kw'Izina r'Imana Data na Mwana na Roho Mutagatifu. Amina. »

Na we mwana wanjye nguhaye umugisha wowe wubahirije uyu muni, ukampesha icyubahiro.

Valentine : *Ateye amasengesho akurikira :*

Dawe uri mu ijuru..., Hubahwe Imana Data..., Isengesho ryo gusabira abatwanga..., Isengesho ryo gusabira abarwayi...

Bikira Mariya :

« Nguhaye umugisha, mwana wanjye, kw'Izina ry'Imana Data na Mwana na Roho Mutagatifu. Amina. »

Valentine : « Urakoze Maman. »

Bikira Mariya : « Wirirweho, mwana wanjye. »

Valentine : *Arikiriza. Wirirwe Ma ! Umunsi mwiza !*

Byandukuwe na Bonduelle Françoise na Nyiransabimana Immaculée.

Gukosora hifashishijwe vidéo iri kuri youtube (<https://youtu.be/CyBVpYXvDJ4>) byakozwe na Ntaramuka Candide na Rwabuzisoni Côme.